

# SEGUNDA EPÍSTOLA DEL APÓSTOL SAN PABLO A TIMOTEO

## Salutación

**1** Huēj huin Pablo. Nī huēj huin apóstol a'mī si-nuguan' Jesucristo rian ni ngüi. Nī nan huin sun huin ruhua Yan'anj gui'yaj sūnj. Nī hué daj 'yā xi'í si hua gataj yya Yan'anj sisi ga nī'na' niganj né', gui'yaj Cristo Jesús.

<sup>2</sup>Nī a'nī 'ngo yanj carta huaj rián re' huín re' Timoteo. Nī rún' huin da'nī 'i ruhuāj huín re': Nī Yan'anj huin chrej né'. Nī Jesucristo huin Señor nicaj sun rian né'. Nī huin ruhuāj sisi gui'yaj Yan'anj sinduj rián re'. Nī nahuin 'i ruhua Yan'anj nī'yaj re' nej. Nī gahuin dín'inj ruhuá re' nej. Nī hué daj gui'yaj Jesucristo nga re', ruhuāj aj.

## Testificando de Cristo

<sup>3</sup>Nī a'uuj si guruhua Yan'anj sisi niganj nanun ruhuāj nī'yā so' ngaa achínj jni'yā nugüi nigan' rian Yan'anj. Nī huēj unánj guitsi rian Yan'anj daj rún' gui'yaj ni xij guimán asij ná. Nī nitaj si da'uī gaquin' mánj. <sup>4</sup>Nī nanun ruhuāj daj gacó re' xi'tj. Nī xi'í daj huin ruhuāj guchi' nī'yā rian nné re' sisi gahuin nia' ruhuāj, gui'yáj

re'. <sup>5</sup>Daj si nanun ruhuāj sisi nun digya' yun'únj re' ngaa xuman ruhuá re' nī'yáj re' Yan'anj. Nī hué daj guxuman sini ruhua xuguan'ánj re' gu'naj Loida nga nní re' gu'naj Eunice nej. Nī gahuin yya ruhuāj sisi hué daj xuman ruhuá re' nej.

<sup>6</sup>Xi'í daj nī gataj snan'ān gunun re' sisi gahuin nucuj ruhuá re' nga sinduj gui'yaj Yan'anj rián re' ngaa gutaj ra'āj chra re'. Nī sinduj daj gui'yaj sisi ga'ue gui'yaj 'ueé re' si-sun Yan'anj anj. <sup>7</sup>Daj si sé si riqui Yan'anj sisi guxu'ui' né' mánj. Sanī riqui Yan'anj sisi nari' nucuj niman né'. Nī ga'ue gahuin 'i ruhua né' guini'yaj né' ni dugüi' né'. Nī ga'ue dugumi né' man'an né', gui'yaj Yan'anj.

<sup>8</sup>Xi'í daj nī si guirí' re' si-na'aj nani re' nuguan' sa' xi'í Señor rian ni ngüi mánj. Nī si guirí' re' si-na'aj xi'í si nūnj ducuga' xi'í Señor. Sanī guinicaj dugüí' re' ngāj huinj tsínj ran' sayun xi'í si a'mī nuguan' sa' xi'í Jesucristo rian ni ngüi. Nī hué daj gui'yáj re' nga si-fuerza Yan'anj anj. <sup>9</sup>Nī nacaj Yan'anj né'. Nī gaquinj Yan'anj né' sisi ga sa' né' rian Yan'anj. Nī sé xi'í si gui'yaj sa' né', nī gui'yaj Yan'anj daj nga

né' mánj. Maan si gui'yaj Yan'anj daj xi'í si hué daj gani sa' ruhua Yan'anj xi'í né'. Ní asij ná sno'o ngaa achin gahuin xungüi nan, ni gui'yaj Yan'anj sinduj xi'í Cristo Jesús rian né'. <sup>10</sup>Sani yyaj ni digyán yya Yan'anj sinduj nan rian né'. Daj si ga'na' xanga' tsínj nacaj né' huin si' Jesucristo, gui'yaj Yan'anj. Ní Jesucristo gui'yaj sisi sî gahui' né' mánj. Ní riqui Jesucristo sisi hua ni'na' né', ni gane niganj né' nga Yan'anj xi'í nuguan' sa' 'na' rian Yan'anj anj.

<sup>11</sup>Ní garij Yan'anj sun man'ánj sisi ga'mi nuguan' sa' nan rian ni ngüi. Ní hué daj garij Yan'anj sun man'ánj sisi gahuin apóstol digyánj si-nuguan' Jesús rian ni ngüi 'na' anéj chrej. <sup>12</sup>Ní xi'í daj ran'ánj sayun acuan'. Sani nitaj si huin na'ā xi'í sayun ran'ánj mánj. Daj si ni'i man'ánj sisi guxuman ruhuāj ni'ya Yan'anj. Ní gahuin yya ruhuāj sisi nucaj Yan'anj dugumi sij man'ánj da' güi ga'na' ruhua' yún Jesús. Daj si hua naga'ui' man'ánj rian sij.

<sup>13</sup>Ní gunun sa' ruhuá re' ni nuguan' sa' digyánj rián re'. Ní daj rún' gunún re', ni hué daj gui'yáj re'. Ní gahuin 'i ruhuá re' ni'yaj re' man'an sij. <sup>14</sup>Ní dugumi sa' re' sun garasun Yan'anj man'án re'. Ní chracuij Espíritu Santo sisi hué daj gui'yáj re', ruhuāj aj. Daj si nne Espíritu Santo chruhua niman né'.

<sup>15</sup>Ní ni'í re' sisi daran' ni tsínj man estado Asia duna man'ánj. Ní hué daj gui'yaj nungüej tsínj gu'naj Figelo nga Hermógenes. <sup>16</sup>Ní huin ruhuāj sisi nahuin 'i ruhua Señor ni'ya ni ducua tsínj gu'naj Onesíforo. Daj si nico' huaj gahuin

niá' ruhuāj, gui'yaj sij. Nun gahuin na'aj sij ga'na' ni'yaj sij rian nünj ducuaga' mánj. <sup>17</sup>Ní nun duna sij si nano' sij man'ánj ngaa gane sij xuman' Roma. Ní hué daj gui'yaj sij da' nari' sij man'ánj. <sup>18</sup>Ní huin ruhuāj sisi nahuin 'i ruhua Señor ni'ya sij ngaa guisij güi ga'na' ruhua' yún Señor. Ní hua ni'i sa' re' daj chracuij Onesíforo yunx xuman' Efeso aj.

### Un buen soldado de Jesucristo

**2** Ní rún' huin da'ní huín re' riánj. Ní huin ruhuāj sisi gahuin nucaj nimán re' nga sinduj riqui Jesucristo rián re'. <sup>2</sup>Ní hua nico ni ngüi gunun nuguan' gatā gunún re'. Ngaa ni dugutā sún re' ni nuguan' daj ango ni tsínj hua nica ruhua sisi digyán ni sí' rian ango ni ngüi.

<sup>3</sup>Ní daj rún' ran' ngo snado sayun huaj sij rian huin sayun, ni hué daj gunucuj re' sayun xi'í si nicaj dugüí' re' nga Jesucristo aj. <sup>4</sup>Ní na'ue gahui 'ngo snado hue' rian nne ni snado gan'anj gui'yaj sun sij ango sun mánj. Sani maan si ruhua sij gui'yaj sun sij daj rún' aran' ruhua snado huin achij a'nin' rian sij. <sup>5</sup>Ní hué ducuanj daj huin, ni na'ue gui'yaj gana ni tsínj ducu luta trofeo sisi na'uej ruhua ni sij dagahuin ni sij rún' ataj tsínj a'nin' niquin' rian ni sij mánj. <sup>6</sup>Ní tsínj anáj xina, ni hua nian si nahuin ra'a sini man'an sij si ga'ui' nna daj. <sup>7</sup>Nani ruhuá re' nga nuguan' atā gunun re'. Ní Señor gui'yaj sisi gara da'nga' ruhuá re' daran'anj, ruhuāj aj.

<sup>8</sup>Sí guini'yun ruhuá re' xi'í Jesucristo. Ní sî guini'yun ruhuá re'

sisi ganá'nij sij scanij ni níman. Ni huin sij da'nī si'nī rey David. Nan huin nuguan' sa' natāj gunun ni ngüi. <sup>9</sup>Ni xi'í nuguan' nan ran'ānj sayun. Ni daj rún' nun 'ngo tsínj guiyaj gaquin' ducuaga', ni hué daj nūnj ducuaga' nej. Sani güenda si-nuguan' Yan'anj, ni si ga'ue gari ni sij ducuaga' mánj. <sup>10</sup>Xi'í daj a'nin' ruhuāj nga sayun ran'ānj nan xi'í si 'i ruhuāj ni'yā ni ngüi ganacui Yan'anj. Ngaa ni ga'ue nācaj Yan'anj ni sij ngāj xi'í si guiyaj Cristo Jesús xi'í né'. Ni gane 'ueé niganj né' nga Yan'anj anj. <sup>11</sup>Nan huin nuguan' xanga':

Ni sisi gahui' né' nga Cristo, ni hué daj ga ni'na' né' nga sij.

<sup>12</sup>Sisi guiran' né' sayun nga sij, ni ga'ue guinicaj sun né' nga sij. Ni sisi gataj né' sisi nitaj si nicaj dugüi' né' nga sij, ngaa ni hué gue daj gataj sij sisi nitaj si nicaj dugüi' sij nga né' nej.

<sup>13</sup>Sisi nitaj si hua nica ruhua né' nga sij, sani hua gue hua nica ruhua sij nga né'.

Daj si na'ue naduna sij nuguan' ga'mi sij rian né'.

Daj huin nuguan' xanga' daj.

### Un obrero aprobado

<sup>14</sup>Hué dan ni na'nij re' chruhua ango ni sij sisi si guini'yun ruhua ni sij ni nuguan' nan mánj. Ni rian Señor, ni hué daj gataj snan'ānj re' rian ni sij sisi si gunun' ni sij xi'í ni nuguan' a'mi ni sij mánj. Daj si nun ní'yanj sisi hué daj 'yaj ni sij. Ni ni tsínj unun' xi'í ni nuguan' daj, ni guere' ni sí' si-chrej ni sí'.

<sup>15</sup>Ra'yanj re' sisi gahuin sa' re' rian Yan'anj. Ngaa ni ga'ue gataj Yan'anj sisi guiyaj sun 'ueé re' rian sí'. Ni si gahuin na'aj re' xi'í sun 'yaj sún re' mánj. Ngaa ni ga'ue nata' nica re' si-nuguan' Yan'anj huin nuguan' xanga'.

<sup>16</sup>Ni si digufj re' nga ni nuguan' nitaj si ní'yanj 'na' chruhua xungüi nan mánj. Daj si ni tsínj a'mi ni nuguan' daj, ni nāanj digufj ni sij nga nuguan' quij hua. <sup>17</sup>Ni daj rún' 'yaj 'ngo ya'ui ngaa huin xachi ya'yoj, ni hué daj guiran' ni ngüi gunun si-nuguan' ni sij. Ni hué daj gahuin nga nungüej tsínj gu'naj Himeneo nga Fileto. <sup>18</sup>Ni achéj nungüej sij ango chrej digyán nungüej sij 'ngo nuguan' sé huin xanga'. Ni ataj nungüej sij sisi hua ganá'nij ni níman. Ni hua duna da'aj ni ngüi si xuman ruhua ni sij nga nuguan' xanga', guiyaj nungüej sij. <sup>19</sup>Sani daj rún' hua ran xi'í hue', ni hué daj hua ran si-nuguan' Yan'anj. Ni ga'ui' Yan'anj 'ngo sello. Ni gataj sello daj: "Ni'i Señor ni ngüi nico' sij." Ni: "Gahuin nini daran' án re' rian gaquin' huin ni é re' tsínj nata' sisi nico' a ni é re' Señor." Daj gataj nungüej nuguan' daj.

<sup>20</sup>Ni ducua' 'ngo xuru'ue, ni man rasun huin oro nga rasun huin plata nej. Ni man ni rasun huin chrun nga ni rasun huin siu yo'ój nej. Ni go'ngo ni rasun daj huin si arasan ninaj ni sij. Ni ango ni rasun daj huin ni rasun niqui arasan sij. <sup>21</sup>Ni hué daj huin nga né'. Ni sisi huin ruhua né' si garasan ninaj Yan'anj né', ni hua nian si gahuin nini né' rian daran' ni tsínj 'yaj quij daj. Ngaa ni ni'yanj né' guiyaj sa' né' daran' ni nuguan' sa' rian Yan'anj.

<sup>22</sup>Ni si ga'uej ruhuá re' nga ni nuguan' quij 'yaj ni tsínj hua lij. Sani gache re' 'ngo chrej nica. Ni guxuman ruhuá re' ni'yaj re' Yan'anj. Ni gahuin 'i ruhuá re' ni'yaj re' Yan'anj nej. Ni ga din'inj ruhuá re' nej. Ni hué daj gui'yaj nuguan'an re' nga daran' ni tsínj hua sa' niman huin ni sij ni tsínj achínj jni'yaj rian Señor. <sup>23</sup>Ni si xacáj re' cuenta ngaa a'mi ni sij nuguan' ni'yun mánj. Daj si nitaj si ní'yanj ni nuguan' daj. Ni hua ni'í re' sisi unun' ni ngüi 'yaj ni nuguan' daj.

<sup>24</sup>Ni 'ngo tsínj 'yaj sun si-sun Señor, ni si ga'ue gunun' sij nga ni dugüi' sij mánj. Sani hua nian si ga ní'yanj sij nga daran' ni ngüi. Ni guini'i sa' sij nuguan' digyán sij rian ni ngüi. Ni ga'nin' ruhua sij nga ni tsínj chran' yun'unj sij. <sup>25</sup>Ni ngaa digyán sij rian ni tsínj unun' nga sij, ni hua nian si ga'mi nanaj sij nga ni sí'. Daj si ana'uij sij sisi nanicaj ruhua ni sí' guini'i ni sí' nuguan' xanga', gui'yaj Yan'anj. <sup>26</sup>Ni ana'uij sij sisi ganunun ruhua ni sí' gunánj ni sí' rian sichre. Daj si yyaj ni 'yaj sichre daj rún' huin ruhua sij gui'yaj sij nga ni sí'.

### Carácter de los hombres en los postreros días

**3** Ni hua nian si guini'í re' sisi ngaa ruhua ganahuij xungüi, ni ga'na' nico sayun. <sup>2</sup>Daj si gahuin 'i ruhua ni ngüi ni'yaj ni sij man'an ni sij. Ni gahuin ruhua ni sij gui'yaj gana ni sij nico san'anj. Ni gahuin nne ni sij nej. Ni ga'mi 'ueé ni sij xi'í man'an ni sij. Ni ga'mi quij ni sij xi'í Yan'anj. Ni si garáj xina ni sij nga si-nuguan' chrej ni sij nga

nni ni sij nej. Ni na'uej ruhua ni sij gataj ni sij si guruhua dugüi' ni sij. Ni nitaj si ní'yanj ni sij rian si-chrej Yan'anj mánj. <sup>3</sup>Ni si gahuin 'i ruhua ni sij ni'yaj ni sij ni dugüi' ni sij. Ni si ga'nin' ruhua ni sij si unun' ni sij nga dugüi' ni sij. Ni ga'mi snan'anj ni sij xi'í dugüi' ni sij. Ni na'ue dugumi ni sij man'an ni sij. Ni gahuin ni sij tsínj huee nin' ruhua. Ni gataj ruhua ni sij guini'yaj ni sij daran' nuguan' sa'. <sup>4</sup>Ni digya' yun'unj ni sij ni dugüi' ni sij. Ni dugunun' ni sij gui'yaj ni sij rasun gue. Ni gahuin nne nin' ruhua ni sij. Ni nano' ni sij güenda man'an ni sij sisi gahuin nia' ruhua urin man'an ni sij. Ni si nano' ni sij man'an Yan'anj mánj. <sup>5</sup>Ni gui'yaj ni sij sisi nico' sa' ni sij Yan'anj. Sani ni rasun gui'yaj ni sij ya'yoj digyán sisi nitaj si nico' ni sij Yan'anj mánj. Xi'í daj ni si guinicaj dugüi' re' nga ni tsínj 'yaj daj.

<sup>6</sup>Ni scanij ni tsínj daj, ni mán ni tsínj huan'anj go'ngo hue' digya' yun'unj ni sij ni yun'unj xana nun ni'í sa' huin ne ni yun'unj da'ui gaquin'. Ni maan si nahuij ruhua ne nga nuguan' quij 'na' chruhua niman ne. <sup>7</sup>Ni niganj digui'yun ne ni nuguan', sani nitaj aman gara da'nga' ruhua ne nuguan' xanga' mánj. <sup>8</sup>Ni daj rún' gunun' nungüej tsínj gu'naj Janes nga Jambres nga Moisés asij ná, ni hué daj na'uej ruhua ni tsínj daj nga nuguan' xanga'. Ni huin ni sij ni tsínj ani quij ruhua. Ni nun ní'yanj ni sij güenda si-chrej Yan'anj mánj. <sup>9</sup>Sani si gui'yaj gana si-nuguan' ni sij mánj. Daj si xacaj daran' ni ngüi cuenta sisi tsínj ni'yun huin ni sij

daj rún' gahuin nga nungüej tsínj gunun' nga Moisés.

<sup>10</sup>Sani hué re' gunun sa' nuguan' digyānj rian ni ngüi nga si-chrē nej, nga si huin ruhuāj gui'yā ne' chrej rian nej. Ni ni'í re' daj xuman ruhuāj ni'yā Yan'anj, ni daj a'nin' ruhuāj nga ni ngüi. Ni ni'í re' daj 'i ruhuāj ni'yā ni ngüi, ni daj gunucuj ruhuāj rian ni sayun nej. <sup>11</sup>Ni ni'í re' daj chran' yun'unj ni sij man'ānj, ni daj guiran'ānj sayun nej. Ni hua ni'í re' daj guiran'ānj sayun xuman' Antioquía nga xuman' Iconio nej, xuman' Listra nej. Sani gahuin ní'nij riānj rian ni sayun daj, gui'yaj Señor. <sup>12</sup>Ni hua yya sisi daran' ni ngüi huin ruhua guincaj dugüi' nga Cristo Jesús, ni guiran' ni sij sayun xi'í Jesús. <sup>13</sup>Sani ni tsínj xi'í nga ni tsínj digya' yun'unj, sani nanj gahuin quij ni sij doj. Ni digya' yun'unj ni sij ni ngüi. Ni digya' yun'unj ni ngüi ni sij nej.

<sup>14</sup>Ni man'án re', sani ga gue gahuin nica ruhuá re' nga nuguan' gahuin chrún re'. Daj si xuman ruhuá re' sisi nuguan' daj huin nuguan' xanga'. Ni hua ni'í re' sisi un ngüi digyán nuguan' daj rián re'. <sup>15</sup>Ni asij ngaa hua líj re', ni hua ni'í re' si-nuguan' Yan'anj. Ni ga'ue gahuin chrún re', gui'yaj nuguan' sa' daj. Ngaa ni ganacaj Yan'anj man'án re' xi'í si xuman ruhuá re' ni'yāj re' Cristo Jesús. <sup>16</sup>Ni digyán Yan'anj nin' si garun ni tsínj ga'mi si-nuguan' Yan'anj. Ni nuguan' daj ní'yanj sisi digyán né' rian ni ngüi. Ni ní'yanj nuguan' daj sisi guini'i né' daj hua gaquin' da'ui né'. Ni sa' hua nuguan' daj sisi nagui'yaj né' si-chrej né'. Ni ga'ue digyán si-

nuguan' Yan'anj daj gahuin chrún né' gache né' 'ngo chrej nica. <sup>17</sup>Xi'í daj ni ga'ue gahuin sa' nin' né' huin né' tsínj nicaj dugüi' nga Yan'anj. Ni ga'ue gui'yaj né' daran' sun huin si-sun man'an Yan'anj anj.

### Predica la palabra

**4** Ni rian Yan'anj nga Jesucristo, ni a'nij sun rián re'. Ni huin achij Jesucristo. Ni ga'na' sij nagui'yaj yya sij nga si-gaquin' ni ngüi hua ni'na' nga ni ngüi hua gahui' nej. <sup>2</sup>Ngaa ni a'nij sun rián re' sisi nata' re' nuguan' sa' rian ni ngüi. Ni hué daj gui'yāj re', nunj si hua ní'nij rián re', asi nitaj si hua ní'nij rián re'. Gataj re' rian ni ngüi xi'í gaquin' da'ui ni sij. Ni gataj re' sisi nun 'yaj sa' ni sij. Ni digyán re' 'ngo chrej sa' rian ni sij. Sani nanaj ga'mi re'. Ni digyán 'ueé re' rian ni sij. <sup>3</sup>Daj si ga'na' 'ngo güi ngaa na'uej ruhua ni ngüi gunun ni sij nuguan' sa'. Sani gahuin ruhua ni sij gunun ni sij ango nuguan' naca. Ni xi'í daj nano' ni sij ga'i maestro digyán ni sí' nuguan' aran' ruhua ni sij. <sup>4</sup>Ni naránj ni sij chraquij ni sij si na'uej ruhua ni sij gunun ni sij nuguan' xanga'. Ni maan cuento nne hua chruhua xungüi nan garan' ruhua ni sij gunun ni sij. <sup>5</sup>Sani niganj ga cuidado man'án re' sisi gani sa' ruhuá re'. Ni gahuin nucuj ruhuá re' nga ni sayun rán' re'. Ni ganata' re' nuguan' sa' rian ni ngüi. Ni gui'yaj sun sa' re' nga daran' si-sún re'.

<sup>6</sup>Ni xi'í si nico' man'ānj Yan'anj, ni ruhua gisij güi dagahui' ni sij man'ānj. Ni gahuin nichrun' güi gahuij. <sup>7</sup>Ni daj rún' 'yaj 'ngo snado

ngaa gui'yaj gana sij rian sayun, ni da'nga' daj gui'yā nga si-sūnj. Ni guisij gui'yā nuguan' ga'nin' Yan'anj sun riānj. Ni 'ngo dugumī nuguan' xuman ruhua né' nej. <sup>8</sup>Yyaj ni ana'uī 'ngo si sa' gui'yaj Yan'anj ngaj. Ni daj rún' nun 'ngo corona chra tsínj gui'yaj sa', ni hué daj gui'yaj sa' Señor ngāj güi ga'na' ruhua' yún sij. Ni 'yaj nica Señor huin güesi. Ni sé urin rian man'ānj riqui sij corona da mánj. Sani riqui sij rian daran' ni ngüi huin ruhua sisi ga'na' ruhua' yún sij.

#### Instrucciones personales

<sup>9</sup>Gui'yáj re' sinduj si ga'na' ni'yaj yoo re' rian nnēj. <sup>10</sup>Daj si hua duna tsínj gu'naj Demas man'ānj xi'í si garan' doj ruhua sij ni'yaj sij ni rasun man chruhua xungüi gaquin' nan. Ni hua gahui sij gan'anj sij xuman' Tesalónica. Ni gahui tsínj gu'naj Crescente gan'anj sij estado Galacia. Ni gan'anj tsínj gu'naj Tito estado Dalmacia nej. <sup>11</sup>Urin Lucas nne ngāj. Guinicaj re' tsínj gu'naj Marcos ga'na' re' riānj. Daj si ni'yān si guisij sij chracuij sij nga si-sūnj, ruhuāj aj. <sup>12</sup>Ga'nī tsínj gu'naj Tíquico gan'anj sij xuman' Efeso. <sup>13</sup>Ni ngaa ga'na' re', ni nica re' si-chamarrāj dunā xuman' Troas ducua tsínj gu'naj Carpo. Ni hué daj nica re' ni libro ga'na' re' nej. Ni rá'yanj ni'yān ni libro huin nnij.

<sup>14</sup>Ni guiran'ānj nico sayun, gui'yaj Alejandro huin sij tsínj agan' gaga'. Ni daj rún' guiran'ānj sayun gui'yaj

sij, ni hué daj gui'yaj Señor castigo sij, ruhuāj aj. <sup>15</sup>Ga cuidado re' rian sij. Daj si unun' nin' ruhua sij nga nuguan' sa' a'mi únj rian ni ngüi. <sup>16</sup>Ni ngaa gan'anj sinij rian ni tsínj nicaj sun, ni duna daran' ni sij urínj gunā. Sani huin ruhuāj sisi si xacaj Yan'anj cuenta si gui'yaj ni sij ngāj mánj. <sup>17</sup>Sani ganiquin' Señor ngāj. Ni riqui sij fuerza riānj nej. Ni ga'ue ganahuij ga'mī daran' nuguan' sa' rian ni ngüi 'na' anéj chrej. Ni hué daj gananij rian rey daj. Daj si daj rún' hua du'ua sigue'e hua du'ua sij. <sup>18</sup>Ni gui'yaj Señor sisi gananij rian daran' nuguan' quij huin ruhua ni sij gui'yaj ni sij riānj. Ni dugumi sa' sij man'ānj da gan'ān rian nicaj sun sij xata'. Ni niganj ga'mi 'ueé né' rian Señor. Amén.

#### Saludos y bendición final

<sup>19</sup>A'nī 'ngo nuguan' huaj rian yun'unj xana gu'naj Prisca nga tsínj gu'naj Aquila nga ni ducua tsínj gu'naj Onesíforo. <sup>20</sup>Guna tsínj gu'naj Erasto xuman' Corinto. Ni dunā tsínj gu'naj Trófimo a'nan' sí' xuman' Mileto. <sup>21</sup>Yoo ga'na' re' ngaa achin natu yahuí nuhuij. Ni a'nij tsínj gu'naj Eubulo 'ngo nuguan' huaj rián re'. Ni hué daj 'yaj tsínj gu'naj Pudente nga Lino nej, yun'unj gu'naj Claudia nej, nga daran' ni jnánj né'. <sup>22</sup>Ni huin ruhuāj sisi gane Señor Jesucristo nga nimán re'. Ni Yan'anj gui'yaj sinduj rian daran' a ni é re', ruhuāj aj.